

ՀՀ ամբողջ արդյունաբերական արտադրանքի մեջ ծխախոտային արտադրատեսակների արտադրությունը տեսակարար կշռով 2010թ. 2%-ից 2019թ. հասել է 9.3%-ի: Միգարետ և սիգար արտադրող կազմակերպությունների ձեռնարկատիրական գործունեությունը երկրի համար ունի ոչ միայն տնտեսական, այլ նաև սոցիալական նշանակություն: Ստեղծվել են հազարավոր աշխատատեղեր, որոշ չափով կրճատվել է գործազրկությունը:

Պաշտոնական տվյալների համաձայն, վերջին հինգ տարիներին ՀՀ-ից ամենաշատ արտահանվող երկրորդ ապրանքը սիգարետն է: Այս ոլորտի զարգացման անհրաժեշտությունը կարևորվում է ՀՀ հողային և աշխատանքային ներուժի առկայությամբ: Ոլորտի կազմակերպություններին ապահովելով տեղական հումքով, նվազեցնելով կախվածությունը ներմուծված հումքից և միջազգային փոխարժեքային տատանումներից՝ կլուծվի նաև ոչ միայն տնտեսական, այլև ՀՀ սոցիալական հիմնահարցերից մեկը՝ գործազրկության մակարդակի կրճատումը, այսինքն՝ հնարավորություն կստեղծվի, օրինակ, սահմանամերձ մարզերի բնակիչներին աշխատանքով ապահովել:

Առ այսօր ՀՀ-ում սիգարետ և սիգար արտադրող կազմակերպությունների ձեռնարկատիրական գործունեության վերաբերյալ չկան լայնածավալ հետազոտություններ, բացահայտված չեն առկա հիմնախնդիրները, որով էլ պայմանավորված է ատենախոսության արդիականությունն ու հրատապությունը և թեմայի ընտրությունը:

Հետազոտության օբյեկտը և առարկան: Հետազոտության օբյեկտ են հանդիսանում ՀՀ-ում սիգարետ և սիգար արտադրող չորս կազմակերպությունները, նրանց արտադրատնտեսական գործունեությունը, ռեսուրսօգտագործման արդյունքները, ծխախոտագործության հայրենական և արտասահմանյան առաջավոր տնտեսությունների ձեռնարկատիրության փորձը, ոլորտը կարգավորող իրավանորմատիվային ակտերը: Հետազոտության **առարկան** են հանդիսանում սիգարետի և սիգարի արտադրության զարգացումն ու արդյունավետության բարձրացումը, կառավարման մոտեցումներն ու առանձնահատկությունները, որակի և անվտանգության միջազգային նորմերին համապատասխանությունը, արտաքին և ներքին առևտրի զարգացումը, ներմուծման և արտահանման հարաբերակցության ուսումնասիրությունը, ոլորտի ձեռնարկատիրական ռիսկերը, ձեռնարկատիրության զարգացման գործում առաջավոր տեխնոլոգիաների ներդրումը:

Հետազոտության նպատակը և խնդիրները: Հետազոտության հիմնական նպատակն է՝ մասնագիտական գրականության, միջազգային առաջավոր փորձի, ՀՀ վիճակագրական կոմիտեի և սեփական ուսումնասիրությունների արդյունքում բացահայտել ՀՀ-ում սիգարետ և սիգար արտադրող կազմակերպություններին առնչվող ձեռնարկատիրական գործունեության հիմնախնդիրները, առաջարկել դրանց լուծման և արդյունավետության բարձրացման հիմնական ուղիները, որի համար ատենախոսությունում դիտարկվել են հետևյալ խնդիրները.

- ուսումնասիրել ձեռնարկատիրական մտքի զարգացման էվոլյուցիան, սկզբունքները, գործառույթներն ու շարժառիթները, ներկայացնել ձեռնարկատիրական գործունեության արդյունավետության գնահատման մեթոդաբանությունը,
- վերլուծել ՀՀ-ում սիգարետ և սիգար արտադրող կազմակերպությունների արտադրատնտեսական գործունեությունը և հստակեցնել ՀՀ-ում սիգարետ և սիգար արտադրելու հեռանկարները,
- հիմնավորել ՀՀ-ում սիգարետ և սիգար արտադրող կազմակերպություններին տեղական հումքով ապահովման կարևորությունն ու տնտեսական նշանակությունը,
- ներկայացնել ՀՀ համախառն արտադրանքի և արտահանման մեջ սիգարետի և սիգարի տեսակարար կշիռը, ՀՀ-ում սիգարետի և սիգարի արտադրությունը որպես տնտեսության կարևոր ճյուղ դիտարկելու տնտեսական անհրաժեշտությունը, հիմնավորել ՀՀ պետական բյուջե հավաքագրված հարկային եկամուտների և տուրքերի կառուցվածքում ՀՀ-ում սիգարետ և սիգար արտադրող կազմակերպությունների առաջավոր և կարևոր դիրքերը,
- կատարել 2010-2019թթ. ՀՀ-ում սիգարետի և սիգարի շուկայի վերլուծություն, հաշվարկել շուկայի տարողությունը, ինքնաբավության աստիճանը, կատարել ներմուծման և արտահանման ծավալների միտումների և տրենդների ուսումնասիրություն,
- ներկայացնել ՀՀ-ում սիգարետ և սիգար արտադրող կազմակերպությունների պետական կարգավորման ուղիները, ձեռնարկատիրական ռիսկերը և ներդրումային միջավայրի բարելավման ուղիները:

Ատենախոսության տեսական, տեղեկատվական և մեթոդական հիմքերը:

Հետազոտության համար տեսական և գիտամեթոդական հիմք են հանդիսացել տնտեսագիտության դասական և ժամանակակից հետազոտությունները, պետական կառավարման մարմինների պաշտոնական օպերատիվ տվյալները, ՀՀ կառավարության ռազմավարական ծրագրերը, ՀՀ պետական եկամուտների կոմիտեի տրամադրած տեղեկատվությունը, համացանցային կայքերը, լրատվամիջոցների հրապարակումները և հիմնականում անձնական ուսումնասիրության արդյունքները:

Տեղեկատվության մշակման և օգտագործման նպատակով օգտագործվել է գիտական հետազոտության կանխատեսման, վերլուծության, տնտեսալիճակագրական, վերացարկման-տրամաբանական, համեմատական, հաշվեկշռային, հաշվարկակոնստրուկտիվ, մաթեմատիկական մոդելավորման ցուցանիշների համադրման եղանակները:

Ատենախոսության հիմնական գիտական արդյունքները և նորույթը: Ատենախոսությունում իրականացված հետազոտություններն ու վերլուծությունները հանգեցրել են մի շարք գիտական արդյունքների, որոնցից գիտական նորույթ կարելի է համարել հետևյալները.

1. Կատարված համակողմանի ուսումնասիրությունների և վերլուծությունների հիման վրա բացահայտվել են Հայաստանի Հանրապետության սիգարետի և սիգարի արտադրության ոլորտում ձեռնարկատիրության զարգացման արդի հիմնախնդիրները և դրանք պայմանավորող գործոնները:

2. Բացահայտվել է Հայաստանի Հանրապետությունում սիգարի և սիգարետի արտադրության, արտահանման և ներմուծման դինամիկայի զարգացման տրենդները, ինչպես նաև ՀՀ ծխախոտի համախառն բերքի վրա ծխախոտի տարածությունների և բերքատվության մակարդակի ազդեցության աստիճանը և տրվել է դրանց տնտեսաչափական գնահատականը:

3. Հայաստանի Հանրապետության սիգարետի և սիգարի արտադրության ոլորտում ձեռնարկատիրության զարգացման արդի հիմնախնդիրների և ոլորտի զարգացման ռեսուրսային ներուժի համակողմանի գնահատման ու վերլուծության հիման վրա մշակվել են ՀՀ-ում սիգարետ և սիգար արտադրող կազմակերպությունների ձեռնարկատիրական գործունեության զարգացման հիմնական ուղղությունները:

Ատենախոսության հիմնական բովանդակությունը

Ներածությունում հիմնավորվել է ատենախոսության արդիականությունը, դրա տեսական և գործնական նշանակությունը, սահմանվել են հետազոտության նպատակները, խնդիրները, օբյեկտը, ուսումնասիրության առարկան և հետազոտության վերջնական արդյունքները՝ մեթոդաբանական, տեսական և գործնական ուղղվածություններով հանդերձ:

Ատենախոսության առաջին՝ «Ձեռնարկատիրության զարգացման տեսական և մեթոդական հիմքերը» գլխում ներկայացված են ձեռնարկատիրության տեսությունն ու մտքի զարգացման հազարամյակների պատմությունը նախնադարից մինչ ժամանակակից տեսությունները, ձեռնարկատիրության սկզբունքները, գործառույթներն ու շարժառիթները, ձեռնարկատիրական գործունեության արդյունավետության գնահատման մեթոդաբանությունը և սիգարետ ու սիգար արտադրող կազմակերպությունների ձեռնարկատիրության միջազգային փորձը:

Այս գլխում ներկայացված է նաև ձեռնարկատիրության զարգացման միջազգային փորձը սիգարետի և սիգարի արտադրության ոլորտում «Ֆիլիպ Մորիս Ինտերնեյշնլ» ընկերության օրինակով:

Ատենախոսության երկրորդ՝ «Ձեռնարկատիրության զարգացման առանձնահատկությունները և առկա հիմնախնդիրները ՀՀ սիգարետի և սիգարի արտադրության ոլորտում» գլխում ներկայացված են սիգարետի և սիգարի արտադրության առանձնահատկություններն ու տնտեսական նշանակությունը ՀՀ-ում, սիգարետ և սիգար արտադրող կազմակերպությունների արտադրատնտեսական գործունեության վերլուծությունը, սիգարետի և սիգարի ներքին ու արտաքին շուկաների առանձնահատկություններն ու վերլուծությունը :

Ատենախոսության երրորդ՝ «Ձեռնարկատիրական գործունեության հիմնահարցերը ու դրանց լուծման հիմնական ուղղությունները ՀՀ սիգարետի և սիգարի արտադրության ոլորտում» գլխում ներկայացված են ոլորտի պետական կարգավորման ուղիները, ՀՀ-ում սիգարետ և սիգար արտադրող կազմակերպությունների ձեռնարկատիրական ռիսկերի կառավարման կատարելագործման գործիքները և ներդրումային միջավայրի բարելավման հիմնախնդիրները:

Առանձնակի ուշադրության են արժանանում պետական կարգավորում և պետական կառավարում հասկացությունները: Որպես ՀՀ-ում սիգարետ և սիգար արտադրող

կազմակերպությունների պետական կարգավորման միջոցառումներ հեղինակի կողմից արվել են մի շարք առաջարկություններ:

Դիտողություններ աշխատանքի վերաբերյալ:

Գրախոսվող ատենախոսությունն իր դրական արժանիքներով հանդերձ ունի նաև որոշ թերություններ, որոնք ներկայացվում են ստորև.

1. 1.1 ենթակետը՝ «Ձեռնարկատիրական մտքի զարգացման էվոյուցիան, շարժառիթները, գործառույթներն ու մեթոդաբանությունը» շարադրված է հետաքրքիր մեջբերումներով և պատշաճ մակարդակով, սակայն մեծ հաշվով անմիջականորեն չի առնչվում աշխատանքի թեմայի հետ: Աշխատանքը կշահեր, եթե այն շարադրված լիներ ոլորտի օրինակով: Նույնը վերաբերում է նաև 1.2 ենթակետի տեսական շարադրանքին:

2. 1.3 ենթակետը հետաքրքիր պատմական նկարագրություն է, սակայն կարելի էր այնպես շարադրել, որ որոշակի եզրակացություններ առաջանային, հնարավոր լիներ ամփափում կատարել:

3. 37-րդ էջում առկա է պնդում, որի համաձայն Գրանդ Հոլդինգը ՀՀ ամենամեծ կորպորացիան է: Կարծում ենք, որ այդպիսի պնդումը իրավական առումով ճիշտ չէ:

4. 3.2 ենթակետը, որում հեղինակը պետք է խոսի ՀՀ-ում սիգարետ և սիգար արտադրող կազմակերպությունների ձեռնարկատիրական ռիսկերի կառավարման կատարելագործման ուղիների մասին, շեշտադրումն արված է ձեռնարկատիրական ռիսկերի մասին ընդհանրապես, տեսական մակարդակում և փորձ է արվել կապել սիգարետ և սիգար արտադրողների հետ, ինչը արհեստական կապակցության տպավորություն է թողնում: Նույնը վերաբերում է 3.3 ենթակետին, ընդհանուր մոտեցումներ են, որոնք չեն կոնկրետացվում և հիմնավորվում սիգարետ և սիգար արտադրողների մասով: Ներդրումային արդյունավետության հաշվարկի կատարումը տեղին կլիներ վերլուծության մասում, այլ ոչ թե ներդրումային միջավայրի համատեքստում:

5. Եզրակցություններում կատարված վերլուծությունն անհարկի է:

6. Կան տեխնիկական և խմբագրական բյուրթի թերություններ:

Եզրակացություն

Վերը նշված դիտողությունները սկզբունքորեն չեն անդրադառնում ատենախոսության արժանիքների և արդյունքների գնահատականի վրա:

Հեղինակը հանդես է բերել մասնագիտական և վերլուծական բարձր մակարդակ, ինչի մասին են վկայում ատենախոսությունը և դրանում ստացված արդյունքները:

Կատարված հետազոտության հիմնական արդյունքները հրապարակվել են հեղինակի ութ գիտական հոդվածներում:

Ատենախոսության սեղմագիրն ամբողջությամբ բխում է ատենախոսության բովանդակությունից:

Ընդհանուր առմամբ, Աննա Հակոբի Պարսյանի «Ձեռնարկատիրության զարգացման հիմնախնդիրները ՀՀ սիգարետի և սիգարի արտադրության ոլորտի կազմակերպություններում» թեմայով տնտեսագիտության թեկնածուի գիտական աստիճանի հայցելու համար ատենախոսությունը և սեղմագիրը համապատասխանում են Ը.00.02- «Տնտեսության, նրա ճյուղերի տնտեսագիտություն և կառավարում» մասնագիտությանը ներկայացվող պահանջներին: Այն իր արդիականությամբ, գիտական մակարդակով, խնդիրների ընդգրկմամբ, ստացված արդյունքների հիմնավորվածությամբ և կիրառման հնարավորություններով համապատասխանում է «Հայաստանի Հանրապետությունում գիտական աստիճանաշնորհման» 6-րդ և 7-րդ կետերին, ինչպես նաև ՀՀ ԲՈԿ-ի կողմից թեկնածուական ատենախոսություններին ներկայացվող պահանջներին: Ատենախոսության հեղինակն արժանի է տնտեսագիտության թեկնածուի գիտական աստիճանի շնորհմանը:

Ատենախոսությունը քննարկվել է ՀՀ ԿԳՄՄՆ ՀՊՏՀ «Միկրոէկոնոմիկայի» ամբիոնում՝ որպես առաջատար կազմակերպության, ամբիոնի նիստում (25 մայիսի 2021թ. արձանագրություն N 11):

Տ.գ.դ., պրոֆեսոր

Ս. Մելքունյան

Տ.գ.դ., դոցենտ

Ս. Եղիազարյան

Տ.գ.թ. դոցենտ

Ս. Քալանթարյան

Տ.գ.դ., պրոֆեսոր Ս. Մելքունյանի,

Տ.գ.դ., դոցենտ Ա. Եղիազարյանի,

Տ.գ.թ., դոցենտ Ա. Քալանթարյանի

ստորագրությունները հաստատում եմ

ՀՊՏՀ գիտական քարտուղար



Ա. Եղիազարյան

25.05.2021